

FJALA E DEPUTETIT FLAMUR NOKA

E ENJTE 17 NËNTOR 2022

Zonja drejtuese e seancës,

Më vjen keq ta them, por ky parlament është shndërruar në një teatër kukullash, ku shqiptarët vetëm për politikën dhe hallet e tyre nuk dëgjojnë. Këtu vjen një Kryeministër dhe flet me gjuhë prej horri, i drejtohet opozitës me gjuhën e vulgut, dhe këtu jo vetëm që nuk reagohet, por këtu ajo banka atje sheh me admirim, këto bankat këtu shohin me adhurim. Kjo është e turpshme! Kjo vetëm për një parlament nuk është e pranueshme. Pastaj pse dy kolegë tanët reagojnë ndaj sharjeve, fyerjeve, ndaj ofendimeve që i bën opozitës dhe popullit opozitar Kryeministri, përjashtohen, ndërsa Kryeministri këtu jo. Kjo është e papranueshme dhe e turpshme për një parlament!

E dyta, zonjë, duhet të kini parasysh një gjë. Këtu te rasti i zonjës Xhaçka duhet debat, madje debat i gjerë. Pse? Sepse nuk ka precedent në botë t'i jepet titulli "investitor strategjik" ministrit apo ministres, t'i jepet prona publike ministrit apo ministres. E bëni vetëm ju. E çfarë tregoni me këtë? Që jeni një grup që doni vetëm të vidhni një bandë hajdutësh, hajdutësh, pastaj t'i mbyllni edhe gojën shoqërisë shqiptare që të mos reagojë, të mos flasë, madje, mundësisht, edhe të mos e shohë atë që bëni ju. E treta, duhet të kini parasysh një gjë: këtu keni nxjerrë një listë diskutantësh. Ja ku i ke! A mund të na thuash tani, jam unë deputet, zonjë, apo çfarë jam?

Pse unë paskam 2 minuta kohë, ndërsa kolegë të tjerë këtu kanë nga 10 minuta e 20 minuta? A mund ta di, a është kohë të foluri kjo 2 minuta? Sali Berisha 2 minuta; Flamur Noka 2 minuta; Albana Vokshi 2 minuta; Edmond Spaho 2 minuta. Tritan Shehu, që ka qenë ministër i Jashtëm, i ekskluduar, është armik, edhe ky nuk mund të flasë! Këtu flisni ju, që vetë pastaj emëroni edhe ndonjë vasal tuajin për të lexuar hartim në emër të opozitës, por jo për të bërë kurrë opozitë! Pastaj ikni në qejf e në alegri me njëri-tjetrin, dilni nga kjo sallë dhe mendoni se kryet detyrën! Turp! Ky është turp, turp, turp!